

平
州
鎮
志

卷
五



永甯州志卷之十

藝文志上

知永甯州事昆明沈毓蘭續纂

傳

朱家民傳

見府志

出明史

家民字同人一字覺民曲靖人萬曆三十四年舉於鄉爲涪州知州天啟二年官貴陽知府安氏之圍貴陽也王三善次於平越家民奉三善命乞援兵於四川又借河南兵共解貴陽圍乃撫傷殘招流移寬徭賦遠邇畏服丁父憂奪情擢安普監軍副使加右叅

懸之覆以板類於蜀之棧而道始通家民所著
俗約言行於世

薛三桂傳

見府志

出明史

三桂直隸人天啟中官永甯知州時永甯知州駐安南衛城歲饑民多自溺其子女三桂嘆曰余爲民父母弗能行善政以召天和而今歲饑民孳自賊其天性如此余罪滋多矣乃日夜勸民令無溺其子女且設法賑之全活者無算已而安氏畔兵及安南三桂率兵民以守力竭死之

學博謝庭薰傳

見府志

拔貢

吳寅邦

周子曰文所以載道也輪轅飾而人弗庸徒飾也況
虛車乎竊嘗三復斯言而求之綱常其道之大者乎
篤於綱常而見之於文有德之言迥異於有言之言
而道從可識先生貴陽府人癸酉舉於鄉乾隆三十
七年任永甯訓導創修州志稿成未刊越六十有餘
年我黃植圃夫子以會稽名儒任州牧知之求其稿
不獲邑孝廉修偉堂先生至省垣於其嗣子得之植
圃先生閱之喜乃重修梓行今永甯志是也藉令先

生非載道之言安能使六十年後之賢州牧見先生
稿不居於創而自處於因乎志中稱其繼往開來有
功名教信矣今取其序而讀之則尤有感者焉先生
受庭訓於子俊公每舉當湖陸稼書先生之生平以
開示繼師蒲城原簡齋先生安平陳定齋先生受喻
義勿喻利爲己勿爲人之訓定齋先生爲安邑之鄉
賢知之稔矣先生爲定齋高弟而不忘定齋言則子
俊公之家傳簡齋先生爲學亦從可識矣至爲禮官
而切切以修志爲急以無負斯文之任民生於三事

謂君之得力於經史者固別有在也使舍本而逐其末專以帖括長不過科第中人已耳安能如是之有功於名教可風於世道也哉吾聞君之居家也肅內外戒奢侈晚年好學不倦作箴自勗人爲畧述其數語曰世故太深性天宜葆耳目易飾神明難欺其他著作不概見跡其立身行已殆有合於古之君子焉至於處世鄰里貧乏則餽給之族人孤苦則收育之或教以誦讀或計以生活必使各得其所而後已故一時之謀升斗需裁成者莫不仰望於君而君之樂

此不疲固由性成殆亦從學問中來歟君生平重誼
氣總角之交皓首不渝中年甫一子年幾冠誤爲友
人子藥死君弗較人咸不平君曰子之死出於藥然
亦數也何忍以若子償而亦使之絕後耶噫非甚盛
德曷克有此晚年復舉二子曰澄曰潛君歿猶在襁
褓卒能自立並列膠庠謂非天之所以報善人歟然
而天之所以報之者應不止此也君以無疾終陳景
溪刺史弔其門輓以聯曰爲善不求知如此翁崇樸
黜華豈願芳名傳里黨修德必獲報想彼蒼鑒觀默

明經黃中理傳

歸安鄒樹祺

公姓黃氏諱中理懷才不售以明經老生善誘人
循循如也進士侯榮封孝廉修武謨咸出其門下采
芹食餼者難更樸數居鄉數十年足未嘗一履公庭
宅與鄧姓鄰割地以讓州牧劉曉村書匾額褒之素
性耿介其施教也主於嚴明有黃鍊鋼之目嗚呼可
謂鐵中錚錚者矣

龍純夫傳

舉人楊棫林

公諱天錫號純夫孝友性成垂老不改以母老不忍
暫離浮雲富貴廩餼終其身州人惜之而公弗計也
性耿介不取非分之財不入有司之室數十年如一
日非特立獨行者能如是乎其誨人也懃懃懇懇列
門牆者不下數百人龍君運光羅君光奎張君宗植
蟬聯登拔萃科先後出公門下邇時士林傳爲佳話
焉孝廉張煥文明經龍運松廩生侯樹勳沐公教澤
咸有文名學使翁祖庚贈以聯曰不以三公易其介

何可一日無此君卽此二語可以想見其爲人矣故
余爲之傳俾後之立身行已者知所取則焉

楊梓園傳

鄒樹祺

楊茂材字梓園州屬關嶺人也幼有至性尤致力於存心之學道光壬午舉於鄉聯捷成進士在籍候銓時州牧劉公撥廣福寺田歸書院寺僧上控謂與邑紳通聲息上游切責司事者咸懼梓園毅然偕修孝廉武謨上訴事乃定朱綬堂太守攝安順府篆素重其爲人將詣郡友人以事囑關說許重賂正色拒之且力明義利之辨由是愈相善事必與謀乙未永甯請加學額梓園任其事事竣力辭議敘戊戌選授廣

東西甯縣知縣蒞任三年有政聲素慙直忤大府意以母老決計告歸出其餘俸建宗祠補修瀟陵橋以貳百金助書院膏伙餘則兄弟均分已無私積母藍孺人年逾八旬梓園事之如孺慕晚年文益精進著存心章制藝二十首皆有關世道人心語其他著作迥越恒蹊人品學問冠冕黔中以故興義安順競延主講席一時門下士掇巍科登仕籍者甚衆咸豐中修孝廉武謨輯州志爲作生傳嗣君庭培同治癸酉科拔貢候選直隸州州判文賜光緒丙子科舉人平

越直隸州訓導文炳邑明經文郁與孫紹書皆英年
入泮修德獲報之說不益信歟今先生往矣予聞州
人稱其品學竊心慕之爰撮其事畧著於篇以質後
之起者

趙德光傳

鄒樹祺

趙德光州屬西里人後徙郎岱原姓張氏幼有膽畧
入營伍歷功擢至都勻協副將記名提督同治初署
貴州提督督兵勦寇屢著奇勲盜賊畏如虎軍民戴
如父以鐵腳板目之狀驍勇也同治六年七月勦賊
於安平縣屬之蘆荻哨乘勝追擊猝中賊鎗墜馬薨
黔撫入告得

旨照提督陣亡例從優議卹死事地方及貴州省城郎岱
廳均立專祠加贈太子少保銜騎都尉並雲騎尉世

職襲次完時給予恩騎尉世襲罔替給全葬銀伍百兩翰林撰文遣官致祭入祀京師賢良祠並本籍及陣亡地方府城昭忠祠事蹟交史館立傳予謚剛節曾文誠奏請歸宗賞給原姓張氏三代封典黔人念公舊勲歿閱廿年談者無不墮淚雖古名將罔或過之惜乎將星早隕不能獨平黔亂爵通侯繼美誠村然而名垂竹帛典隆俎豆亦人傑也哉